







L'HEVREUX
SVCCES DE LA
CONFERENCE
DE SOISSONS,



A PARIS,
Pour GILBERT LE VEAV ioignant
la Court d'Albret derriere S.
Hillaire.

M. D C. XIV.
AVEC PERMISSION.

CASE

F

39

326

1614h

THE NEWBERRY
LIBRARY



L'HEVREUX SVCCE'S
DE LA CONFERENCE
DE SOISSONS.

IL y a quelque bon - Ange là haut dans le Ciel , n'en doutons nullement , qui commis à la conduite particuliere de ce grand & florissant Royaume, vueille incessamment à sa conseruation. Nos peres l'ont autrefois essayé fort souuent en leurs extrémitez & necessitez plus pressantes : lors que l'esperance humaine. La derniere chose qui abandonne les mortels, leur a failly , l'assistance diuine commençant à leur reluire , a releué puissamment leurs affaires, & conuertty leurs ruines & gemissemens, en feux de ioye. Mais sans monter aux siecles passez , & aux choses esloignées de nostre cognoissance, qui ne touche d'ordinaire que fort legerement les esprits , nous en auons en l'affaire qui s'est traittee ces iours passez à Soissons, vn si clair, si certain & si manifeste tesmoignage, que si ç'a

esté stupidité iusqu'à cest heure de ne le remarquer, ce seroit d'oresnauant impieté de ne le confesser. Car bien qu'il ne faille soupçonner legerement rien de mauuais, de personnes comme eux, qui pour toutes sortes de considerations ont le plus d'interest à la manutention & gloire de ceste Couronne, si n'y auoit-il pas peu a craindre, que, comme les mauuais esprits se messent quelquesfois parmy les orages & tourbillons de l'air, pour faire quelque dégast & ramage, il ne se trouuast aussi quelques mutins & factieux parmy nous, qui se glissant dans leurs conseils, ne les poussassent insensiblement à quelque violente & dangereuse entreprise. Il n'y a iamais en vn grand & populeux Estat, comme celui-cy, faute de gens que l'impatience du repos public, l'inquietude d'une conscience cauteniee, la pesanteur des incommoditez domestiques, & choses semblables tiennent incessamment aux escoutes, n'espians que l'occasion de quelque changement, pour se jeter aux champs, & faire profit, s'ils peuuent, des ruines & calamitez de leur patrie. Car ils sont trop foibles d'eux-mesmes, il leur faut, comme aux plantes de Lierre, quelque puissant appuy pour les esleuer & soutenir. Ils pensoient l'auoir trouué en la retraicte & en l'authorité du premier Prince du Sang, telle qu'un chacun scait en ce Royaume, & comme on croit d'ordinaire fort aisément ce qu'on desire, se figuroient que son mécontentement estoit le fondement de leurs funestes & damnable desseins. Et desia ils commençoient d'aiguïser leurs

5
courage & leurs eſpees de l'eſperâce d'une guerre civile, de laquelle ils fomentoient par toutes ſortes d'artifices les ſemences entre ceux que le malheur de la France auoit diuiſez. De ſorte qu'il n'a pas tenu à ces boute-feux là que ces premières bluettes ne ſe ſoient embrasées en vne grande & ouuerte diuiſion. Mais celuy qui tient en ſes mains les cœurs des Grands, & par ſecrettes inſpirations les tourne, ſelon qu'il luy ſemble neceſſaire, où il veut, a tellement touché ceux de l'autorité deſquels dépendoit icy bas la reſolution de ceſte affaire. que preferants l'intereſt public au particulier, ils ont compoſé doucement toutes choſes, & par vne prompte & entiere reconciliation, affermy la paix & tranquillité publique, au contentement des gens de bien. Car Monſieur le Prince craignant avec raiſon, que ſon abſence trop longue mal interpretée par quelques vns, n'ouuriſt contre ſon intention le chemin à quelque dangereuſe faction dans l'Eſtat, au prejudice du Roy & de ſon peuple, ſ'eſt ſagement reſolu, & à ſon exemple ceux qui ſ'eſtoient joints avec luy, de leuer par ſon retour aupres de leurs Majeſtez, les ombrages & deſiances que ſon eſloignement formoit. En quoy on ne peut aſſez louer ſa prudence & moderation; marques certes beaucoup plus aſſeurees de ſon affection au bien public, que les niueaux d'or & d'argent donnez par le Duc de Bourgongne pour deſſert à ſes amis en vn magnifique & ſolemnel feſtin, comme arres du deſir qu'il auoit de bien redreſſer & compaſſer les affaires du Royaume. non moins indiſpoſé pour

lors que le Roy. Car la suite de ses violents deportemens fit assez cognoistre que ceste reformation dont il faisoit tât de parade par tout, n'estoit qu'un piege couuert pour y faire tomber sous specieux pretextes les vns apres les autres, ceux qui trauersoient ses desseins, & remplir leurs places de personnes à sa deuotion, comme il fit à Montagu Grand maistre. Ruze cōmune en tous siecles, à ceux qui ont voulu se vanger couuertement de leurs ennemis, ou establis leurs affaires particulieres dans la bien-vueillance populaire. Ainsi que sont accusez dans nos histoires d'auoir fait autresfois sous Charles VII. les Comtes de Clermont & de la Marche Princes du Sang, le Connestable de Richemont, & quelques autres Officiers de la Couronne, pour se defaire, comme ils auoient desia fait de Giac & du Camus de Baujeu, de deux ou trois, ausquels ils imputoient à crime la faueur & bonne grace du Roy, du nom & de l'autorité duquel ils les accusoient d'abuser au prejudice & detrimēt du pauvre peuple. On sçait quel fut le pretexte de la Praguerie onze ou douze ans apres, & quel le sujet, & depuis del'alliance faite en l'assemblee de Neuers, entre les Ducs de Bourgogne, de Bretagne, d'Alençon, & le Comte de Vendosme, qui marris de n'estre tenus aux degrez qu'ils croyoient leur appartenir, de n'estre appelez & suiuis aux Cōseils, honorez & respectez en leurs chargez, soulagez en leurs terres, payez de leurs pensios, sous couleur de poursuiure le reglement de la Iustice & le soulagement du peuple, contraignirent le Roy,

assez empesché d'ailleurs contre l'Anglois , de leur accorder à chacun en particulier ce qu'ils demandoient. Autant en firent sous Louys XI. son successeur , ceux que le regret & despit de se voir postposez à certaines personnes de peu esleuees aux premiers rangs , vnit sous la couuerture du bien public pour la manutention de leurs dignitez , que le traité de Conflans verifia deux ans apres auoir esté le vray & vnique but de toute ceste grande equippee. Car apres auoir leurré le peuple du lustre de ceste autant vantee que souhaitée reformation , ils conuertirent toutes ces belles & plausibles promesses , en vtils & honorables appointemens , que l'histoire marque par le menu. Le Duc de Berry frere du Roy à qui on auoit fait porter la marote , adiousta la Duché de Normandie à son appanage , qu'il trouuoit trop petit. Le Duc de Bourbon reçut le payement entier de son mariage. Le Duc de Bretagne recouura sa Comté de Montfort. Le Duc de Calabre eut promesse d'estre assisté d'hommes & d'argent au recouurement du Royaume de Naples. Le Comte de S. Paul eut l'office de Connestable ; le Comte de Dunois & les autres furent remis aux charges & dignitez qu'ils auoient tenues sous Charles septiesme. Du bien du peuple, du reglement des affaires , pas vn seul mot , non plus que des douze tables , ou de la destruction de Troye. Ce que nous rapportons particulièrement , non tant pour flestrir la memoire de ces grands Princes là d'aucun reproche , que pour instruire les peuples à n'ouuir que sous bonnes enseignes

l'oreille aux promesses & sermons de ceux qui ayants la reformation publique en la bouche, n'ont le plus souuent rien moins en l'ame que le desir de la promouoir & del'aduancer. Blasme dont on ne peut sans calomnie charger ceux qu'il appert par l'issue n'auoir suivant les protestations qu'ils en ont faictes depuis le commencement, esté meus en cecy que d'un zele vn peu trop ardent possible, mais autrement louable du bien public, despoüillé de toutes considerations particulieres. Car, bien que les fausses impressions qu'on leur auoit données de la mauuaise affection de quelques vns des principaux Officiers & plus confidents seruiteurs de leurs Maestez en leur endroit, les ayent excitez à s'en plaindre, si est-ce que la passion n'a pas eu tant de force sur eux, que le respect du Souuerain n'en ait eu encore dauantage, pour les empêcher d'entreprendre rien sur ceux dont ils n'approuuoient pas les déportemens. Ils se sont possible éclaircis depuis à loisir de la verité. Et pour les quatre cens cinquante mille liures qu'on leur dōne, ce n'est que pour leurs fraiz & leurs mises, ny Amboise, que pour assurance seulement, iusqu'à la prochaine assemblée de Sens; lieu choisi par eux entre trois qui leur ont esté presentez, pour y venir sous la protection du Roy qui y sera present, contribuer leurs aduis & conseils salutaires, au règlement &tablissement du Royaume. Lenitif comme le plus prompt, aussi le plus conuenable à nos maux. Car le miel pour estre doux, ne laisse pas d'estre deterisif. S'il y a quelques abus en l'administration

tion de la Iustice, en la direction des Finances, & generally en la conduite des affaires, comme nous sommes, à nostre grand regret, contrainct de recognoistre que la longueur du temps & la corruption vniuerselle des mœurs en a introduit beaucoup en tous les Ordres de cest Estat, d'où en pouuons nous attendre vn meilleur & plus certain remede que de la sagesse, prudence & integrité de tant de grands personages dont sera composée ceste belle & illustre compagnie? L'exemple de nos ancestres, qui s'en sont en pareilles occurréces autresfois si bien trouuez, nous est vn gage du fruiet qui nous en reuiédra, si nous sommes si sages de nous y disposer serieusement, comme il faut. Nous esperons que la France en amendera de quelque chose, & que ceste Conference ne luy sera point inutile. Que si le malheur portoit que nous fussions priuez de ce bien par la mauuaise intelligence des vns & des autres, ie diray hardiment ce que j'en pense, en vain nous promettons nous de le receuoir d'ailleurs. C'en est fait pour long temps. Car de penser d'y venir par la guerre, hélas! y auroit-il bien encore parmi nous des gens si depourueus de raison qu'ils se laissassent persuader que ce fust vn chemin de reformation? Qu'on nous en marque, qu'on nous en monstre vn seul exemple dans toute l'antiquité. Ie m'assure que qui s'en rapporteroit aux habitans de Soissons, & aux paisans de Champagne, n'approuueroit iamais ceste violente procedure. Car quelque ordre qu'y ayét sceu apporter ceux, qui pour establir en la creance populaire l'opi-

nion qu'ils vouloient qu'on eust de leur affection au public, auoient grand interest à reprimer la licence & l'insolence des gens de guerre, principalement deuât qu'aucun acte ouuert d'hostilité leur eust lasché la bride, si n'ont ils sceu si bien faire, qu'ils n'ayent laissé és lieux par où ils ont passé, de tres-mauuaises impressions de leur discipline, avec les marques de leur audace & avarice. Les plaintes en sont venuës iusques icy. Qu'on conjecture vn peu de là ce qu'ils eussent fait en l'ardeur d'vn assaut ou d'vne bataille? Ce ne sont que pillages, que rançonnemens, qu'incendies, que meurtres, que carnages sanglants & hideux. La pensee seule en est effroyable, à quiconque n'a dépoüillé entieremēt le sentimēt humain. Ce fut vne parole vrayement loüable & digne d'vn sage Prince, que celle du Duc de Berry, chef de cesteligue du bien public, dōt nous auōs parlé cy deuât, qui ayant rencontré par la ville sept ou huiet cens personnes blesez, *Hà! (dit-il en plein Conseil) que j'aymeroïs beaucoup mieux que ceste guerre n'eust point commencé que de m'acquiesir plus de richesses & de grandeurs au prix de tant de sang!* Nous cognoissons tous Monsieur le Prince, pour estre d'vn si doux & si benin naturel que s'il se represētoit aussiuuemēt les mal-heurs & desolations d'vne guerre ciuile, comme peuuent faire ceux qui l'ont autres-fois veüe, il aymeroit mieux souffrir toutes choses, que de signaler les premices de ses armes par la ruyne & calamité de sa patrie. Il n'y a que ceux qui n'en ont iamais gousté, 'aufquels (comme dit l'ancien prouerbe Grec) elle semble douce. S'il y a eu de-

puis cent ans en Frâce, homme qui en peust parler, c'estoit le feu Admiral de Chastillon, qui ayant appris par vne longue & penible experience que c'est d'estre chef de part, respondit à celuy qui quelques iours avant sa mort luy conseilloit de se retirer tout blessé qu'il estoit hors de Paris, qu'il n'en pouuoit sortir sans rentrer en la guerre, & qu'il ayroit cent fois mieux mourir que d'y retourner. Son issue mesme peut monstrier combien il est dāgereux de former vn nouveau party dans l'Estat, quelque fondement, quelque lustre qu'on luy sçache donner. Car il n'y a rien que les Souuerains oublient si mal-aisément que les rebellions de leurs subiects. Ils n'appellent point autrement toutes entreprises faictes sans leur aduē: L'arrest prononcé à Noyon & executé à Paris cōtre Jacques d'Armagnac, Duc de Nemours & l'inscription mise par le commandement de Louys XI. sur le tombeau de Guillaume Chartier Euesque de Paris, tesmoignent ce que disent nos historiens, qu'il eut tousiours l'esprit bandé à l'extermination des partisans du bien public. Il ne perdit iamais le desir de s'en venger. Sagemēt doncques ont faict ceux qui rentrans promptement au chemin duquel le despit de voir les affaires ne prendre pas le train qu'ils desiroient, les auoit esloignés, ont euité outre les incommodités & fatigues ordinaires de la guerre, l'indignation de celuy, des bonnes graces duquel depend tout l'accroissement & bon-heur de leur fortune. Le Roy est le Soleil qui les esclaire, qui les viuifie, & qui à propremēt parler, les faict ce qu'ils

font. Ils ſçauent ce qu'ils luy doiuent & ce qu'ils en peuuent eſperer, ſi ſe contenans dans les bornes de l'obeiſſance & de la fidelité, ils ſe rendent dignes de ſes biens-faits & faueurs. Leſquelles ſa Maieſté ne departira iamais plus volontiers qu'à ceux dont il ſe ſouuiendra auoir eſté mieux aſſiſté durât ſa minorité. Il eſt deſ-jà fort proche de l'âge auquel la loy du Royaume a accouſtumé de mettre entre les mains du Souuerain le gouuernail de l'Eſtat. Lors il pourra diſpoſer abſolument de toutes choſes & dire, il me plaist. Sa volonté réglée par la ſeule crainte de Dieu, ſera la loy de ſes ſubjects de toutes conditions & qualités. Nul ne ſ'y pourra oppoſer ſans crime. La premiere choſe qu'on attend de luy en ce temps-là, eſt ſa reſolution ſur la ſurceance de ces alliances d'Eſpagne. L'affaire eſt de poids & d'importance, on luy en fera de rechef entendre les motifs & les raiſons d'un coſté, il les peſera ; On luy repreſentera de l'autre les conſiderations de ceux qui ne les approuuēt pas, il les eſcouterà : ce qu'il trouuera le meilleur, ſe fera. Certes ſi c'eſt à des gēs d'entre le peuple cōme moy, de porter leur balotte en la deliberatiō de choſes ſi hautes, ie ne peſe point qu'il le puiſſe demouuoir de l'opinion qu'il en a eue iulqu'à ceſt heure. Il n'en changera point. Pourquoi le feroit il ? Les Eſpagnols ſont nos ennemis diſent quelques vns: ils l'ont eſté de vray, n'y a pas long-temps, mais iamais tant que les Anglois. Car le Duc de Feria ny Mendozze n'ont pas fait la moitié du mal en France qu'y auoiēt fait autres fois le Duc de Berthfort & Talbot. Neant-mōins

nous ne les reiettons point. Mais ie veux qu'ils ayent fait deux fois pis, est-ce à dire pour cela que le traicté de Veruins soit honteux ou preiudiciable à la France? Car ie ne voy point de raison qui deffende de faire mariages avec ceux avec lesquels on a fait la paix. Vouloir rendre les haines immortelles n'est certes point vne maxime ny Chrestienne ny politique. Combien de nations ont terminé de longues & opiniaistres querelles par semblables expedients? La nostre les a autres-fois fort vtilement pratiqués. I'en obmets les exemples, vn chacun les sçait. Sont-ce Mammelus ou Margajats, avec lesquels nous n'ayons iamais eu auparauant aucune accointance, aucun commerce? Qui ne sçait l'ancienne & estrôite confederation des Roys & Royaumes de France & de Castille, obligez mesmes sous grandes maledictions à l'entretenir, comme ils ont fait fort long temps, sans aucune noise ou contention, iusques à l'entreueüe malheureuse de nostre Loys & de Henry à Bayonne? Pourquoy n'espererions nous de la renoüer par le double lien de ces mariages aussi serrément que iamais? Car pour ceux qui craignent, que ces alliances ne soient des estraintes, semblables à celles dont les Chirurgiens serrent le bras au dessus de la veine qu'ils veulent ouurir, pour mieux saigner la France, ils ne montrent pas tant en cela leur prenoyâce que leur timidité. Sommes nous moins sages ou moins puissans que sous Charles IX? Il n'y a pas encore si long temps: Si ce n'est parauanture qu'on estime que nous nous endormions sur le

vin de ces nopces , & que sur la foy de ces nouveaux contracts on dégarnisse les frontieres de Picardie , ou les ports de Prouence , pour soulager les finances du Roy. Il n'y a point d'apparence en cela. Ce sont vaines imaginations & terreurs Paniques de gens , qui pour la pluspart apprehendēt plus l'Inquisition d'Espagne , qu'ils n'aiment la grandeur & trāquilité de la France. Si l'ambition & le desir de s'estendre leur a fait autresfois entreprendre sur nous , l'experience qui leur en couste cher , leur a assez appris , qu'il n'y a rien à gagner de ce costé. cy pour eux. Ils ont autant , voire peut estre plus de besoin de nous , que nous n'auons d'eux : Ils seront soigneux de conseruer & entretenir nostre amitié. Pour le moins le doiuent-ils estre , s'ils sont aussi sages & aduisez que nous les estimons. C'est pourquoy il ne faut rien craindre pour ce regard : En tout cas , soyons seulement tels que nous voulons qu'on nous croye , nous les verrons venir : toutes leurs menées , toutes leurs pratiques n'esbranlerōt iamais le repos public , si viuants en la bōne vnion & intelligēce que nous denons , nous nous contenons dans les bornes de l'obeyssance & de la fidelité. Il netiendra qu'à nous. Mal-heur à quiconques s'en escartera dorresnauant pour quelque cause & pretexte que ce soit. Conuertissons donc par vne vraye & entiere reconciliation vnanimement nos esprits à la manutention de ceste paix , qui acquise à la France par la valeur admirable de HENRY le GRAND , luy est maintenant conseruée par la prudence de ceste grande Princeesse ; consti-

tuée auiourd'huy sur nous au gouuernement
 de l'Estat. Ceux qui sçauent la façon dont sa Ma-
 iesté s'est comportée depuis le commencement
 de ces affaires iusqu'à ceste heure, la diligence
 dont elle à vsé pour mettre sur ceste occurrence
 ordre à toutes choses tant dehors que dedans le
 Royaume, & la peine qu'elle ya prise, ne peuuent
 nier sans tres-grande ingratitude, voire mesmes
 sans felonie, que nous ne luy en ayons tous, tant
 que nous sommes, vne singuliere obligation. Il
 faut que nous le recognoissions, que nous l'atte-
 stions. Nous le recognoistrans, nous l'attesterōs.
 Et quand nous ne le ferōs pas, la posterité à qui
 l'histoire doit le fidele recit de ce qui se passe, en
 nous reprochant nostre silence, en rendroit
 quelque iour à sa memoire le tesmoi-
 gnage honorable, que meritent
 ses heroïques & incom-
 parables vertus.

F I N.



Handwritten text in a cursive script, likely a historical document or letter. The text is arranged in approximately 15 lines, though many are illegible due to fading and bleed-through from the reverse side. The script appears to be from the 16th or 17th century.

Handwritten text, possibly a signature or a date, located in the lower center of the page. It is also largely illegible due to fading and bleed-through.